

遇真記

予臥病九江西林寺有黃冠來憩宇下漫就之察其氣象似有
道者問其年八十九年其生天順之六年其祠簿則成化七年
所給也丰神磊落如四十許人種髮被耳未盡皤問其名曰葆
真子陽道生也予曰先生之齒長矣而其神觀不衰意者有長
生久視之道乎長生久視可學乎葆真子曰君之貌類儒者亦
知孟子之言乎曰妖壽不二修身以俟之所以立命也夫修身
詎有外於存心養性即存心養性則能立命立命者造化在我
長生烏足以盡之故凡求長生者皆以妖壽二其心者也予愕
然曰孟子之言則然矣然玄宗之所謂學天仙者非歟葆真子
曰皆人也皆冠皆履皆行皆止皆默皆語皆生皆死而獨曰仙
是有以異乎人也皆仙也而獨曰天仙是有以同乎天也天者
尊而無上神而莫測者也今夫人亦甚眇矣所以可爲天仙者
以其心天之心也心天之心必復其性之初不復其性之初則
汨於情之未復性所以之天汨情所以之入之人也者猶夫人
也凡吾之所存無以甚異於人而乃欲超乎人其於天未有萬
分之一相應也而曰我烹我鉛我鍊我汞天仙矣不亦謬乎陰
符經曰觀天之道執天之行天道者天心也夫能心天之心然
後能行天之行中庸之能盡其性則可與天地參子儒者曷不
蹈之予曰卽如子所云玄宗奈何以養性爲孤陰而謂其無成

道藏輯要

真詮序

四

鬼集六

葆真子曰此非知道之言也性卽道也陰陽氣也二俱不離亦不雜以性爲孤陰是以氣語道也且性也者無極之真太虛之靈二五之精天之靈爲上帝其次爲日月星辰地之靈爲后土其次爲社山之靈爲山神水之靈爲水神草木昆蟲之靈爲草木昆蟲之神人之靈獨異乎哉而曰孤陰是不見性者也故曰非知道之語也予曰然則奚爲而葆真子曰子獨察夫子之用心其同乎人者幾其同乎天者幾去其人就其天心無不天乃所以爲真人人之至於真也斯可語於天仙矣予不覺爽然自失匍匐起再拜之曰先生殆非黃冠者流也予今乃知玄宗之的云葆真子曰此非道生之說也道生受諸太虛太虛受諸

道藏輯要

道詮序

五

鬼集六

寥陽寥陽受諸洞真洞真受諸雲峯雲峯受諸長春長春受諸重陽又曰吾有真詮二卷卮談一卷子試觀之翌日吾且之廬山觀天池返乃就女取書以行遂行挽之不可予慎藏其書以俟然竟不返嗟夫予不識葆真子之果爲何如人也今其書具存予惜其抱斯懿而不顯於世故爲之刪潤而傳之玄同子桑喬子木甫記

嘉靖辛亥歲八月一日